



薛考功集卷第二



考功郎中毫薛蕙君采著



五言古詩

贈何大復

昔我弱冠日翩翩綴文辭發藻翰墨林志意縱
 橫飛慷慨惟古人自言不足為歷覽百千年揚
 馬乃吾師雖非絕倫才王子幸見知一朝遘嘉
 會英俊相追隨追隨親交者四海皆匹儔矧復
 適我願得與子同遊惟爾當今時聲名溢皇州

陵邁班與張卓犖屈宋流興文何鞿擘世儒焉
可侔慚予非子友何以結綢繆綢繆不相棄感
子意纏綿自負窈窕姿何言謂我妍吁嗟知己
人自古亦皆然嫵婉三歲間朝夕共周旋金石
豈爲固膠漆匪云堅如何忽分析使我心嬋媛
嬋媛傷人懷紆軫無終極送子臨衢路泣涕霑
胷臆願言從予邁安能有羽翼浮雲逝不返飄
風不我值江河廣無梁山高不可陟嘆息何所
道但言長相憶相憶亮何益怨此去路長昔者
同心友今爲參與商人生百年內倏忽若流光
良會復何時一別殊未央君其篤平生慰我遙
相望斯言儻弗諼傾想惠來章

贈孟望之四首

迢迢東流水悠悠遠行子送子出邁時離別自
今始山川一間之相去日千里徘徊蹊路側思
心從中起人生百年內聚散誰能止壯年豈再
得良時不可俟念我平生歡眷眷未云已
驅馬城門陽舍馬登山丘携手立踟躕還顧望

皇州皇州一何麗藹藹皆王侯冠蓋似浮雲賓
客自相求衢路豈不廣之子不得留慷慨肉傷
心爲子獨懷憂

昔余與君子未見心相知邂逅在今辰果若平
生時願得結歡好贈子以新詩含意未及申行
行復何之念當從此去彷徨出郊畿行人倦往
塗終言與我違倉卒執手間嘆息空相持愧無
晨風翼送子起翻飛

踟躕郊野外白日匿西山行人去有期安得久

周旋請爲游子吟與子結纏綿憂來動人心惻
愴不能言言念平生友意氣非徒然行役不足
辭貧賤非所憐君其篤明信慰我心惓惓

贈張仲脩二首

青青豫章樹寄生濁水泥風波摧以傷不如蒿
與藜吁嗟貧賤士子行何栖栖昔爲猛虎步今
爲觸藩羝忠信獲罪辜有願不克諧英雄一失
據反覆良可哀

采藿東門側終朝喟長嘆虹霓干白日朔風何

翻翻興言念我友攬衣涕洟瀾金虎構宮鄰
此百禍端有鳥孤飛翔悲鳴奮羽翰逝言不我
顧戀戀傷肺肝

叙歸

平祿耻虛薄依方託踈慢偃息雖久淹幽棲寧
若晏一朝幸時會逝言遠遊宦端服朝闈闔抽
毫謁雲觀短迹乏高足弱植謝貞幹豈同漸陸
羽乍類登天翰役役感羈旅悄悄懷歸嘆悵望
承明廬徘徊霸陵岸脩路歷城闔初服返里閭

園墟申宿諾壤石改新甃陟榭瞰東田尋溪泝
南澗竹樹互遶迴魚鳥共凌亂平生覽往昔卽
事踐昏旦冥寂資神理牽攀防世難梅生入會
稽龐公去江漢傷哉古今慮絕景山岩畔

過城西野

初服性已曠久病忘仍疲豈謂傷淫滯偶以戀
棲遲聿來年歲遷驟看節物移晴陽改陰候暖
律變暄吹晨發高闈曲夕驚清川湄白雲生幽
沚綠水激層涯外感耳目超內尋神蘊披泛濫

滄洲趣髣髴崑山姿揆已信薄劣遭時易磷緇
來復雖不遠徃寒豈能追孟晉終何追罷歸聊
所宜願言在弗諉援毫申此辭

晚起

花上露乍晞林端霞已照幽人倚戶起春禽迎
日叫昔苦束帶疲今知散髮妙方同稽公懶豈
顧管生誚

夏夜

逍遙避暑地玄夜敞陰扉涼風池上滿白露月

中稀玉釵乍續墜翠竿不停揮淹留時未輟向
曙乃言歸

田中築舍修治樹藝

莊生卧濠梁范子去海隅行止信難侔遠跡要
不殊伊予慕棲遁脫冠歸里閭卜宅近郊坵葺
宇就田廬南榮面崇岡北牖背幽墟雖非山水
地取樂自有餘築牖仍先趾穿池即故渠林木
盡舊行圃畦皆曩區寡欲罕所營衆美亦云俱
爵祿無常位貧賤有安居豈惟畏淹留得以免

憂虞懽此平生情永言焉可渝

晚出齋中

園中明晦異日晏氣候齊餘光杳新傾圓景迴
東躋叢木夾空廂涼颺扇幽閨稍稍陰籜籊翻
翻夜禽啼美人間遨遊即景自招携褰裳出北
戶杖策佇南階俯察雙渠涌仰視三星低真賞
恒在近至鑒故不迷神往迹難留志存理無睽
寄言山林客安用登雲梯

冬初

聞冬肇時序時序異疇曩烈烈嚴氣升肅肅玄
陰敞同雲匝阡陌凝霜被榛莽寒暑鑿迭代休
咎究消長郊園值窮節庭戶息羣響疾病倦淹
留寤寐縱偃仰感物殷懷抱離人絕心賞幽獨
豈無悶至樂非外獎形變化隨逝意愜神俱往
永解區中緣安排契真想

除日

悠悠天北運冉冉日西靡茲年俄且周薄暮亦
云已端居撫辰序靜言感化理時來變窮節事

生乖壯齒託疾侔長卿歸田擬平子處困豈不
難執操良足恃瑣瑣旅客志坦坦幽人履莊周
貴達生伯陽戒知止尚公識損益賈傅辨憂喜
在昔仰玄訓于今寤微旨即此怯塵慮因之蹈
靈軌

丙子十月二十八日初發鄉邑述征有

作

旅宦忝從事卧痾輟歸田俛仰似昨日荏苒踰
三年末路謝貞素積習慚實緣整駕別鄉邑

言重徂遷瞻途背梁宋振策指幽燕昔往遺維
繫今來就糾纏豈伊行役嘆畏此平生誓嬰世
迫物累撫化懷冥筮齊契百年內高揖千載前
慮存跡匪虧意愜道仍全斯言俟明哲因歌遂
成篇

憶句曲山寄顧英玉

夙齡諷圖謀微尚寄丘壑神期雖未并斯衷固
無忤江南僊靈地句曲奧且博孔記述形蹟河
篇表經略青磴下崎嶇丹壁上岵嶸靡靡被石

菌噫噫戲雲鶴聞道甘閒曠養痾困疲弱即趣
懷同好贈言負前諾巖廊竊已忝江海自堪託
敢希東都金且訪西山藥

苦暑

朱明戒夏令大火次南國溫風有增響旱雲多
異色宵眠惕朝旭且坐望夕昃伊鬱不可聊
曠何由得靜勝昔嘗解神昧今始惑如何平生
懷未建古人則感物百慮作遺生羣動息撫中
俄有契履運似無即單生忌外彫張子惠內道

去心累終然謝通識

候大駕回

西北收皇旅東南歸帝京山驅八駿下海汎六
龍行後車環外區前駟集神垆支兵連四校中
堅屯九營絳氣曳朱竿青雲生翠旌饒歌綵吹
激行漏玉鸞鳴入觀萬國至清宮羣后迎金貂
雜流景圭璧委繁星錄功對五帝合符朝百靈
俯窺地紐正仰瞻天柱平郊裡方展義升封將
告成祈招美王度長謠頌休明

祀陵作

幽陵首衆嶽朔海摠羣川形蹟閔烏策圖象隱
瑤編時晦貞期遠運開昌命先遷都既相宅遺
冢乃登仙翠鳳舞丹阜蒼龍蟠紫淵叢谿杳藹
藹積岨肅芊芊園塋環列隧殿寢被曾巔房御
清以謚神路峻且玄悽愴山庭露蕭瑟松門煙
光景緬如存春秋俄屢遷聖情鬱終古睿思蘊
遐年周衛物惟備崇樹禮仍虔歲事展哀敬
享竭明蠲百靈妥宗室九列翼皇筵承德

闕陳歌志未宣曾是厠末位僂俛謝朝賢

秋日署中簡諸君子

新秋改炎節涼臻溽暑旋淒淒金氣舒昭昭素
景鮮流風靡幽薄輕靄映澄川飄颻激楚吹眇
杳泛蘭煙吏隱案牘簡齋居神想偏目耽霞上
鶴耳玩露中蟬几席縱偃息纓紱謝牽纏卧閣
趣無輟含毫興邈然西曹擅文苑蕭晨惜暮年
徘徊錦帳坐吟嘯白雲篇望美勤徒結懷勞憂
莫蠲賞心儻不隔答訊冀相傳

老幼集卷三
九
贈饒平令曹先生

炎方信巨麗海嶠彌光輝衝波迅交屬斷岫崒
相圍銅乳隱雲穴金膏被石碕青林互繚繞玉
草競芳菲嶺戍接丹徼縣齋當翠微塞開盡洲
島偃卧同巖扉高閣祇自閉鳴琴方獨揮心私
物皆定欲靜神來依靈境邈難測異人游豈稀
虛無翡翠蓋髮髯芙蓉衣安邑儻可累吾將從
此歸

雨霽閒望

池邊風嫋嫋竹裏影微微薄暮西山曲蕭條涼
雨歸伏檻看秋色四睇亂清輝哀猿連谷響迷
鳥隔雲飛朝市名仍繫林壑興難違眷言反初
服蘅杜尚芳菲

看月

秋氣麗華月月華麗層穹餘輝稍熠爚流影漸
瞳矐臨水寫珠綴紫花映綺櫳蘭林團墜露桂
樹鬱迴風佳人在何許咫尺限西東殷勤離緒
潤寂寥懽讌空陸生北堂上謝客南樓中音息

一以緬思心安可窮星漢屢淹薄展轉夜難終
可惜芳菲節羈處怨飛蓬

贈劉子緯

朝與佳人期相望愁欲盡夕與佳人隔相思笑
復隱西園佇飛蓋東郊滯歸軫嚶鳴悅和響芳
菲悲戚墮室邇怨鄭謠媒勞哀楚引抑念聊可
忘含情詎能忍

對雪簡崔洹野何大復

清陰含洞房淒氣飄飛閣起視綠雲中白雪乍

落紛紛集青瑣盈盈舞羅幕玄沼涌珠花翠苑
棲瓊萼良辰眷悅豫幽居感離索有酒今若斯
思君共斟酌

雪後翫月作

朝眠高閣內吟弄風前雪夕登曲榭上游盼雲
中月月出輕雲斂雪罷流風闕連輝有餘映縈
光無斲輟首眺懷乍新闌賞景彌絕雙陰相蔽
虧並彩互明滅炎寒俄聚散弦望劇盈缺撫物
亮固然孤裏異懽懽

長安西門候朝

隱隱多唱傳蕭蕭宵車驚茲夜方向晨中心憚
將暮朱華淪未啓瑤光儼初度絳霄麗明月素
飈流藻霧嚴防限中禁周廬局內附岵嶸北宮
朝徙倚西墉步矚目紫微宇蹠足玉堦路矯迹
承華側徒慚班振鷺

荅何大復

宵懽不繼晨朝游豈延夕欵念未云周勞心彌
已積篤好追昔宗興言撫今戚纏綿金玉音參

差翰墨跡開帙虛雲閣臨觴闕瑤席惠思荷來
章褰裳奉良覲

月夜坐憶

明月三五時流光千里外虛館風冷冷寒墀霜
靄靄不見南樓客徒憶西園蓋懽酒無盈觴憂
襟有餘帶沉吟靜夜思緬邈佳人會

過孫世其館中

傾暉隱闌晷屯陰升初宵陟降並招携游行共
逍遙坐檻仰層穹披戶聆清飈羅星照高牖行

雲動微綃旁眺稍閶闔極望亦寥寥即此蓄心
賞眷言詠長謠

訪史內翰不遇

回車望雲臺攬衣陵霧術山齋晚猶閉幽人朝
已出拂石矚新詠窺牕覘散帙含情不可愬徘徊
悵如失

何中翰夜集

寥寥玄冬夕穆穆北堂讌徘徊芳翰詠慙慙羽
卮薦霧幌入鮮月風蕩下微霰自顧耻薄虛何

因屬深暎

崔太史席上詠翠杯

綺坐倦朝歡翠杯出宵酌月艷寫疑空雲光挹
愁落碧醴共玲瓏華燈增照灼一得侍君閒終
言厠醕酢

詠御溝鴈

太液春風起瀟湘鴻鴈歸照水翹圓趾隨波弄
短衣曲池稻梁足上林矰繳稀由來江海性還
從塞北飛

雜詠 六首

詠風

蛾眉簾下出春風
花際來雲落鬢間
髮蟻轉手中杯華
梁塵乍動羅幃影
復開試將巫山雨
吹向楚王臺

詠燭

客醉北堂上花生
夜戶中色亂歌梁
月影暗舞衣風珠
簾照不隔羅幌映
疑空願得陪長讌
相看曲未終

詠屏風

屏風十二曲羅列
洞房隅雙環金屈
膝四角錦流蘇蛾
眉行處隱玉袖坐
中扶因歌留上客
翠蓋少踟躕

詠蒲

昔聞詠塘上今見
翫池中紫茸含細
莖綠帶舞輕叢蜻
蛉高下逐翡翠往
來通徘徊桂蘭渚
竟日與君同

詠萍

參差如霰布的鑠似星出魚戲影初開鳥散文
猶密幸因雲雨會且免風波失無裨江海流徒
謝芳菲質

詠兔絲

根株不自立枝蔓爲誰飾偶同雜組文未比朱
絲直園客何由整天女詎堪織暫附松栢枝終
辭霜露色

荅祝禮部

并居寡懽愛懷疴積悲戚勞君惠繁翰結言慰

離析荒楚向踈蕪寒花方寂歷良辰已云暮海
揚不可覲

贈士奇允升

暮春黃鳥飛始悲歡晤稀首夏朱櫻熟重嘆離
居速離居何契闊沈憂鬱難豁君同汲黯疾予
有相如渴偃息閉東軒扶杖一窺園遲遲雲日
媚萋萋卉木繁素書旣滿几清酒亦盈尊此時
微二子賞心誰與論

秋日感懷

白露墜何早清風淒已寒今茲復秋日悵爾切
悲端三十未聞道一官祇素餐區區諒無補惴
惴詎能安撫已每多念逢時恒鮮懽徒然抱慙
恨嘆息歲將闌

舟行雜詩九首

金門再指佩滄洲一振衣沿洄歷秋水偃仰盼
清輝塞鴈尚未發檣烏還解飛臨流聞楚調爲
我送將歸

居夷諒非願游吳或有託今我匪伊人心期偶
如昨行役多憂苦棲遲詎爲樂君看岸上蓬秋
風益飄泊

白露晚來生汀洲把杜蘅浮雲西北返孤客且
南征習習野吹急汙汙川漲平徒看秋潦盡未
可俟河清

息徒指川裔繫纜臨叢薄飄颻散襟帶風吹零
露落俯折岸邊蘭仰聽雲間鶴寄言天路上共
爾違贈繳

秋雲翠可鑒明河景如髮川上夜寥寥徘徊望

新月流光睇轉近餘輝攬還沒念彼同懷人關
山日超忽

木落風雨夜水生蘭蕙洲已值清秋日旅客思
悠悠感時臨歲晏惜逝對川流此際亟歸去蕭
條難久留

行子怨路長長路方漫漫前瞻但雲霧却聽空
波瀾銷憂命懽酌取樂興哀彈安得晨風羽紆
我懷歸嘆

朝辭枉渚汭夕鶩清川路經過方自今神期宛
如故沈吟招隱曲徘徊遠游賦西北有浮雲行
行一返顧

桂嶼饒涼吹蘭皋足素氛鳥疑沙上霧魚避水
中雲寥廓有欣矚蕭間無厭聞行將入江海長
對白鷗羣

郭外治宅

抱瘵謝交游樓間避紛濁郊廬未云遠已覺心
綿邈屏居聊寄拙營室惟從樸茅茨無結構房
櫳罕彫斲門庭褊蕪穢牀帷多蘚駁方因遁蓬

華更欲蓄磽嵬灌園希仲子易農晒方朔無云
尼父譏遽鄙樊須學

詠料絲燈

淮南王爲盃西京金作枝未若茲燈麗擅巧昆
明池霏微狀蟬翼連娟侷網絲煙空不礙視霧
弱未勝持碧水點葱鬱彩石染萎蕤霞疊有無
色雲攢深淺姿焚蘭發香氣對燭映紅滋明月
詎須侈夜光方可嗤

游西郭

向晚思觴酌西郭翫芳菲風花半未落林鶯猶
自飛殘景初移席涼氣稍侵衣褰裳及將晏無
使露中歸

首夏

寥寥塵外意更對蕭然境竹竦檀欒葉雲起嵯
峨影跡幽疑避喧神虛匪耽靜嗒爾此端居唯
知晝方永

冬夕

空齋生夕霽俛仰俄清絕開帷翫光景就檻看

雲月寒條響哀吹曾林皓餘雪懷人不可見徒
令自怡悅

曉坐齋內

近曙早鶯喧乍暖游絲密稍稍竹待風紛紛花
就日臨堂點芳翰披衣翫仙帙賴此自多娛
緩幽憂疾

郊館

夜雨旦初霽郊館試窺臨東風急花水朝日麗
雲林多景每難遇幽期還易尋端由來序速倦

思坐相侵

始還別業春際游覽

結宇帶層曲列牖俯雲湍幽篁上交錯恠石下
叢攢春際聊騁望園中皆可懽芳林秀丹萸綠
水散清瀾余本文離者平生茲考槃淪飄從遠
役留滯守微官言邁祗云易思歸方慮難悵然
迫遲暮五載始投冠迨此尋棲息復得遂盤桓
撫心殊已愜日夕廢朝餐

西郊

清曠自有素寧獨在幽深誰謂西郊地宛似南
山岑四野多景色青春晴復陰鮮雲冠綠苑廻
飈翔翠林寢疾託閒逸即趣恣登臨嬰累悼自
昔取適懽在今豈嗟時易頽但顧樂難任穿池
玩游儵種木候鳴禽將營人外賞聊賦丘中吟

行園

巾駕入丘樊披榛理園囿前臨古墟路却望清
渦曲經營闢池館周流羅卉木風落繽紛葉露
冒歲蕤竹窈靄殊冬夏寂寥異昏旭野陰常

暝水氣先秋肅少壯旅衣冠疲病歸農牧晚
任情性蕭散諧心目雅懷名山意益厭人間俗
歲晏終如何行行訪巖谷

郊居作

池籩鮮珍鱗樊籠多鍛翮物情忌窘束人事傷
紛迫拙薄謬榮塗踈慵謝朝籍銷聲背誼競息
影投幽隙丘園雖寂寞悠然殊自適徘徊弄文
史流連眷泉石神輕片雲上目瑩清川激蓬嶠
宛相聞滄洲如在覩未申隱淪志稍習湛冥跡

外慕非所希聊用終晨夕

曉出東田遂游溪上

鳥鳴曙色至雲收春氣鮮
寐覺啓南扉顧步出東田
遇賞乍淹留乘景更夤緣
折芳順蘅薄涉水弄珠泉
感來憂已忘神往樂俱捐
宵默任真游蕩漾契靈筌
何待崑丘上騰化始爲賢

齋夕

觀書每成倦徒倚憑齋閣
煙景翳山池春陰歛花萼
衰侵迫惆悵節變乖行樂
不有恬然想

因堪寂寞

暮春園中作

荒徑入園墟經旬曠游涉
林飄依檻絮蔓引橫階
葉春闌意已倦風晚花如怯
憮然閱徂景彌使憂相接

對雨

病困怯炎蒸陰雨差相慰
芳林洗花藥綠野籠雲氣
坐憶郭西池芙蓉定開未

荅顏惟喬

俗紛倦城肆放浪懷林莽命賞來芳訊探竒協
幽想蕭條南苑際中夏猶淒爽雨霽綠泉生風
驚白雲上禽魚行盼睠水木坐俯仰梁棟下陰
霏房櫳逋哀響淪飄病轉劇偃蹇年日長名山
仍未去末路竟何往故人念相慰賤子擬自廣
旦日佇登臨願言操几杖

游城南園林

用開襟濯寒水爲韻

崇丘亘中野逶迤似層臺斜攀陰磴上下見涼
雲開對酒已判醉無勞歌管催

徒倚薦蘿逕徘徊松桂林尋雲延遠步窺水瑩
幽襟微子共行樂終然孤賞心

別苑命飛觴平沙徙行幄藉蘭初解帶拾藥俄
盈握迴策步前溪塵纓仍自濯

麗札昔相約名園今共看雨苔晴亦濕風篠夏
猶寒永日倦高宴清歌時向闌

日落風景佳中園霽氛滓輕雲染松色清露飄
蘭藥新暑漸炎蒸重來翫溪水

城西亭子宴集

用桂林留夏颺爲韻

逐涼向何許平臺俯煙際青臯杳重疊素水縈
迢遞酒冷渚邊雲衣芳苑中桂一遇林下期仍
借塵外契

攀林摘朱果汲井牽瑤甕涼風拂露榭清氣流
雲棟四時俄轉瞬萬緒紛如夢相顧各喟然中
飲可辭痛

抱痾慨獨卧恣興欣同遊搴芳薜荔苑窺鳥鷄
鵲洲日暝石潭淨風涼雲樹稠坐看夕景晏與
君仍暫留

幽渚携風策履阿息煙駕亭亭荷照景嘒嘒蟬
吟夏低徊悟形變索莫慙時謝自緣心有念臨
觴屢驚咤

永日避炎暑中園屏煩囂登危乍悽愴臨迥更
蕭條積水含密霧空林送新飈眷言攄幽抱援
翰賡長謠

八月十四日夜餞伯昭五首以圓景早

已滿為韻

秋堂慘別酒夕幌傷離弦酒停弦亦闕乍瞻望

舒圓窈窕度清漢空濛浮素煙此時一彈思再
徙風中筵

筵徙杯復傾風罷衣猶冷懽意始依依憂心終
耿耿茲遊並偶坐後別侶孤景婉孌惜流光攜
手夜方靜

靜夜未遽央華月出尚早微氛映脩竹皓露散
芳草殷勤遲暮日緬邈平生好及茲暫晤語安
能寫懷抱

抱懷不可寫徘徊詎云已漸聆寒漏促屢顧清
陰徙宵深河斂素曙近雲成綺願子引餘觴爲
別悵伊邇

邇別非久淹征駕憇南館黯黯金波滅離離玉
繩斷緒言殊未竟積思俄已滿行矣念相慰裁
音異無緩

郭外

置酒命交游巾車向城郭徘徊空野外樂緒翻
蕭索涼風變雲日白露驚川薄秋水增烟霧衰
林半搖落良時一若此人生詎如昨援琴寫哀

弄停觴罷權酌愧彼忘情者孤悰似無託

寄劉希尹

代馬怨殊羣越鳥懼同族如何平生愛分背乖
心曲悠悠間鄉縣冉冉踰涼燠念子行寡偶我
居亦筮獨疲病蹙逃位饑寒方殉祿出處雖未
同身世均羈束山林鮮疵吝市朝多寵辱寄言
訊之子遲望歸來躅

夕詣郊外

久瘵精幽抱端居乏權趣日夕覽郊園俛仰增

愁慕林靜動風颺川迥來雲霧征蓬駛且斷
鳥驚還聚感物悟時變憂生測年暮衰顏漸已
迫稚齒誰能駐淹留歲方晏沈吟日云屢有懷
空若茲無聞良可懼

晚游墟中

獨行墟里路歸來秋景夕鴈落清川永鶴唳荒
林寂超遙跡乍遠優游意彌適寄言簪組士擾
擾真堪惜

自西野循渦曲臨眺贈同遊者

養拙非藏器寢病豈逃名進慚冠蓋羣退慕丘
園耕多病齒髮暮屏居懷抱盈稍尋臯壤樂甞
慰蹉跎情入野緬曲折臨谿屢迴紫霜濃石道
淨水歛雲潭清煙景淡將夕汀洲遞微明踈蕪
岸篠落寥戾川禽鳴心賞夙所重身累適已輕
豈辭疲曳倦幸與良遊并濟時謝明哲量已保
幽貞願從求羊輩放曠終吾生

卧病賦懷

工拙詎同區通蔽固殊致由來辟世者未逮匡

時智伊余本踈誕屏跡歸朝寺非材託間散孤
賤違榮利邴子忌多秩嵇公病爲吏雖微二賢
操猶全匹夫志適已每多慰養生仍寡累方探
至人旨始慕神仙事玄覽矚昭曠冥棲佇靈異
白雲存髣髴滄洲形夢寐淵虬無近韻霄鵠有
遐意願結松喬侶人間聊可棄

雜詩 五首

植草會成蔓種木當爲株休咎豈虛生景響不
相踰呂生釣竒貨蘇子挾陰符六國假相印萬

老幼集卷三
戶割名都一朝計不售倉卒蒙罪辜狙詐適自
困傾巧定焉如生時諒非榮旣沒辱有餘達人
安貧賤貴欲弭禍樞

富貴使心惑嗜欲致行妨宴安損性靈美疾生
膏盲吾觀古來士高躅互相望首路或暫同中
道更蒼黃班生嗣前烈馬融遁遐方藉梁奄爲
累附竇終自戕逼人識尚爾咄咄可悲傷小人
難久要君子貴其常草木有貞心歲晚盛芬芳
玉以采自斲丹以澤自銷高才耀當時荼毒竟

稍招傅子感飛蛾張公喻鷦鷯思患豈不微履
險果焉逃嗟哉世路間覆轍常所遭千金憚垂
堂胥靡易登高願隨方外士杖策歸蓬蒿

神龍徙魚笱靈鳳違兔且至性炳幾先憂患寧
相加在昔有明哲引身蹈幽遐豈無當世心岐
路多網羅於陵厲清操接輿肆狂歌寂寥以爲
侶自然以爲家紛華非不榮反覆將如何

伊昔學千祿忝竊造中朝時來豈自期奮跡階
雲霄秉筆屬西署改服廁東曹公卿競推引賢

老幼集卷三
三
俊慕遊遨微滿近傾覆中心憂且勞興言命旋
駕偃息就林臯浮沉各有宜趣舍實相遼諒非
高門士聊欲恣逍遙

冬夜

高閣寂已夕清陰澹如霧林塘正寥落霜月轉
幽素蘊真非境累賞勝由神悟倚戶望西園無
人共微步

舟中看雨

微照下亭臯輕雲翳川曲一望春波上蕭條煙

雨綠餘花飄近渚衆鳥喧深竹借問同行子何
處停舟宿

志感二首

二儀育萬物四時代寒暑三五成哲王質文有
今古聖人貴通變愚者或未睹周公典禮樂光
翼兄與父宣尼謀魯國一變道斯舉舊章不可
忘季世賴毗輔苟能繼先志改制固法祖國家
歷年祀庶績罔不叙乘時宜損益更化俟明主
愧無賈生書今日悟當宁

聖王久已徂方策不俱逝大者載詩書遺烈播
無際猗嗟德不泯文章亦相儷吾觀三五蹟曠
代若同世區區漢唐來群儒猶善繼歲蕤竹素
間君相賴攸濟皇朝屬全盛重光施來裔自非
良史才大業有瑕翳願言見作者綴緝列九例
紛綸括群典俶儻襲六藝言文行則遠斯理良
匪細倦倦告在位秉筆當勿替

贈別翟廷獻

燕酒沽玉壺彈箏唱吳歎四坐咸寂寞傳觴但
踟躕踟躕送將歸故人與我違當春對歌酒愁
思無芳菲憶昔同棲泊長安競行樂朝野盛歡
娛朋曹何灑落休澣及朝昕追遊越城郭東第
盡王侯西山具丘壑秋月韻鳴弦春池洗華酌
流澗平原飲儻蕩鄱陽謔良時易徂謝同心忽
離索浮沉判岐路聚散殊今昨之子宮中州余
方尋故丘譙國望梁藩咫尺抱離憂攀嵇虛往
駕訪戴稀來舟空投三歲字詎申千里遊今王
繼百六龍飛自南服年開嘉靖號祥符大橫卜

西雝群振鷺東圃叢脩竹一辭北山隱再忝南
宮錄判袂屢愆期隨牒忽來茲過逢暫以笑勞
苦翻成悲君謂久遊梁俗態好蒼黃寧容長卿
慢競笑次公狂當戶忌芳草投人疑夜光以此
污微官不如還故鄉感君誠不偶顧我今何有
孺効卒無聞官箴竟多負一割慕鉛刀千金慚
敝帚循省但空虛悲傷就衰朽衰朽遽幾何良
會將無多昔遊接形景今別邈山河白雲梁苑
色綠水蓬池波留連暮春日殷勤遊子歌歌闌

日向斜遊子起登車臨岐欲有贈何因解袵
鏃羽異鴻鵠存身乃龍蛇行行念自愛無爲怨
天涯

太嶽詩三章贈陸元望少參之武當

荆楚富名嶠太嶽氣雄哉雲杪擢珠林天中懸
玉臺遙遙人境絕肅肅神君來

神君集福地文祖樹靈宮金銀列城闕藻繪搖
烟虹蕭然僊局吏坐嘯青山中

青山好棲遯朱門倦淹薄空握五芝圖坐恐三

花
落
儻
傳
招
隱
曲
願
附
南
來
鶴

省中賞牡丹是日喜雨得知字

嘉卉含采芬榮還及時茲言喜雨日忽值看
花期四月春草歇南宮韶景遲烟扶翠柯立風
拚絳房披珠樹安足種倦人應未知何如翰墨
署共攬芳菲枝賞勝自難偶時和方在斯作霖
懷相業憂旱體皇慈則燕已云忝屬歌諒非宜
空然搦赤管詎報瓊瑤辭

雨中姚氏園候客

朝日變陰靄滿園啼鳥聲坐看微雨至彌憐芳
樹清綠波洗沙嶼碧蘚翳山楹此時遲嘉客臨
觴無限情

桂洲詩

白雲覆秋水桂樹在中洲美人行笑歌攀援以
淹留竭來游宛洛歲暮增離憂著書子當歸遲
我艤扁舟

蒲汀詩 四首

鳳飛俯丹穴龍遊顧珠淵神舉豈無娛冥期方

老幼集卷三
三
眇然哲人抗殊迹昭世冠群賢聲華雖館閣賞
寄乃山泉

泉源出山下蒲生徧汀曲波中演漾春沙際參
差綠離離映寒草冉冉依荒竹發地闢蘭皋臨
流葺荷屋

荷屋積芳馨蒲汀轉幽敞蒼茫起暝色寂歷含
秋響白鳥狎魚梁丹螢入書幌淹留江海思曠
絕風塵想

風塵謝高韻廊廟企鴻猷適已道雖勝匡時
彌優德人鮮凝滯大化任沉浮終叅子房幄始
泛鴟夷舟

徐子容薛荔園十三詠

思樂堂

徂謝迫遄期悠逸成今昔平生行樂地仿徨覩
遺迹寒飈起危館曙露依幽石象設尚如存神
游眇安適

石假山

君家洞庭畔猶嫌去山遠園隈構石岫林際開

雲巘迤邐帶華池崎嶇入層苑不載扁舟來臨
流詎能返

水鑑樓

可憐池上樓俯映池中水點綴畫難成分明鏡
相似雲移荷葉下魚戲房櫳裏素景一離披知
有微風起

風竹軒

綠竹自便娟復值微風集暝色颯將寒秋聲
輒還急琅玕歎易折翠羽紛難拾幽人最惆悵

衣空竚立

蕉石亭

芳草如翠幄亭亭冒巖阿丹梯承晚映碧澗寫
秋柯日入烟霧滿夜來風雨多預愁霜雪至爲
樂恐蹉跎

觀耕臺

東菑及農節高臺試登陟阡陌路透迤陂塘水
紆直歷歷原上耕依依隴間食雖無耒耜勤端
居增歎息

老幼集卷三
三
薔薇洞

洞口薔薇樹者來冉冉紅停舟綠水曲携酒綵
雲中穿林入窈窕牽葉望玲瓏祇謂躋攀盡望
望轉難窮

荷池

臨水放蘭柁處處花相觸霞水共參差香風時
斷續上看繡羽亂下睇文魚逐口暮未歸來聊
就舟中宿

栢屏

何時別陵上移居來後庭牽條擬峰勢總葉與
山形白雪轉自綠綵雲相對青無勞台嶺側陵
虛搏翠屏

留月峰

陰崖抱嶽竇倒景如明月玉氣夜逾妍珠光朝
未滅雲歸暈正滿霧上輪初缺西園讌客處臨
翫情無輟

通冷橋

隔崦聞秋籟行尋窺碧山雨過沙岸曲泉吐石

梁間雲深乍浙瀝風起更潺湲綠源欲何極日
夕未能還

花源

曲水寫珍池盈盈送紅萼朝來湖上雨吹此繁
花落旖旎縈魚藻徘徊逗蘭薄含悽眺芳渚劇
念春銷鑠

安陽道中留別崔子鍾

伊昔游京邑周旋預簪裾親仁值賢哲汎愛及
頑踈出處或異趣聚散罕同居今來再晤對奄

忽十載餘十載俱南北行路何傾側色斯子奮
飛明夷我垂翼失道愧先迷知幾服深識握手
慘無言撫心空歎息歎息亦何爲迺適丁此時
鳳至樂周德麟傷悲魯衰旣往亮無及將來猶
可追所憂日月逝壯志已陵遲陵遲竟無成世
故更相嬰平生陷悔吝晚節企幽貞無咎庶言
慎有祿不可榮要子同心事千秋揚令名

贈劉希尹

曰余田野人勝冠弄文墨自顧在泥塗敢言生

羽翼儀封誤眄睽汝南虛獎飾竭來長安道復
與君相識伊君本卓犖聲華光岱岳氣高稷下
辯文富淹中學禮闈同貢薦宰府聯登擢何意
他山石濫厠荆岑璞當代論交地如君真寡二
周旋幸嘉會提携辱高義仙曹多暇日帝京饒
樂事朝隨紫陌游夜集華堂醉清時信難偶世
故俄紛糾我方釋詔獄君已遭讒口金虎正縱
橫玉馬空奔走憫默各傷心蒼皇一分手升沉
難預計往復更遷逝失勢蘭化芻乘時董爲帝

愚士故繫俗達人解其契寵辱安足驚脫略人
間世征塗積冰雪游子辭京闕惆悵北風詩眷
戀河梁別昔爲金石交今爲雲雨絕擾擾離筵
散曖曖行塵滅親交日以稀心緒重多違同人
旣遠謫孤客亦懷歸雲霄憚投足風塵思振衣
願言乞骸骨從君俱奮飛

釣磯

釣磯上斗折偃仰俯石瀨曾雲來目眇清波鑿
衣帶捫葛聊爲綸持荷還作蓋高情豈羨魚道

老幼集卷三
三
遙在塵外

月夜望雪

朝看雲際雪夜坐月中樓宛似青天上俯觀銀漢流猶憐日未盡好爲上簾鉤

贈王山人

古有形法家史官常著錄王生世其術曾中羅海瀆爲我談形勝九州如在目手持諸公詩詞華爛珠玉吾聞古者葬溝壑爲椁憤緣情棺槨易彌文宅兆卜古道日陵夷異哉末代俗送死

徒空言實傲生者福昔人信恬淡今人苦多欲紛紛衰世事利塗寧異躅天地無終極陵谷屢翻覆縱觀大化中千載亦云促旣死誰所遇生取衣食足不貪以爲寶斯言當自勗

贈蘇允吉侍御二首

逃虛喜同人絕絃悲異代獨行增永懷賞廢有餘嘅平生友英俊末路離懽愛何圖蓬藿間復與親仁會知言甚合符定交果傾蓋先民夙所仰斯人固其輩鴻才何炳蔚雅行乃韜晦官聯

侍從列意寄風塵外相望已勞積辭訣能無槩
差池惜良晤繾綣見交態吾衰采真游子賢熙
帝載一結同心言當令歲寒在

鹿鳴美野草君子貴贈言聞善樂相告此義古
所敦若人信名世乘運佐羲軒觀風練國體游
藝究詞源求友及薄劣作賦貴丘園感彼詩人
語何以報與璠曰余嗜樸學自信莫能諉舉俗
不見是惟君期討論立言非不朽功德鮮常存
逐末事終小得一道斯尊外物棄浮雲貴已養

靈根願招同懷客共入無窮門

小園舊名退樂中丞馬敬臣先生改曰
常樂因為題榜兼賦古詩二章見贈蕙
敬次韻奉酬且記吾園得名之始

西原亡舊業南郭得新廬開荒築場圃改徑通
村墟達人賞我趣遠訪林間居年德非可親氣
味略未踈傾蓋語移日縱談懷抱舒置酒瑩心
亭促席臨清渠然竹煮山茗炊黍薦園蔬贈詩
借高論題榜忝名書雖榮華袞袞自顧實空虛

平生志尋樂憂患每有餘好學謝希顏寡過願
師遽守節欽兩龔知止企二疏微公蘊真鑒晤
語復誰與

荒園負城郭窮巷翳榛莽誰云一區小我懷殊
自廣結茅尚素樸種竹愛蕭爽樂此林廬就忘
彼年歲長自予釋纓紱一紀脫羈鞅獨學歎孤
陋成性愧存養稍知天路近欲陟未能上希音
寡偶和好事莫來往遂輟丘中琴千載寄遐想
晚遇林慮公折節猥相訪望洋增大觀披雲快

高仰諒非温伯子何以酬心賞

贈李子西

自余友君子寒暑僅三易始見歡如故再遇契
逾昔周旋尚無幾款眷良已積常恐人事乖及
茲果離析枉駕就我別執袂城南陌舉觴忘獻
酬坐客皆悽惻愛深悲不淺辭盡意何極霄漢
子奮飛山林余偃息出處苟同心楚越非異域

送林汝雨提學嶺南

聖人久不作命世豈無人賢哉白沙翁崛起南

海濱研幾見智崇固窮占道醇吁嗟百年後斯
人不復聞儒林實淵源庶官非等倫君雖舊史
氏選擇典斯文番禺名都會多士何彬彬之子
允師表先正有遺塵干仞獨高逝九淵終自珍
出處苟不審性命諒奚云衰俗日陵夷我懷難
具陳風聲繫先倡典刑期再新嘉會亟增脩江
門堪問津贈言同心友景行良可遵

日暮

日暮坐東軒直望西山曲白雲藹藹至雨我窓

前竹茲晨憚隆暑披衣廢朝沐徙倚乘夕涼清
風散炎燠大象幹流行變化一何速日新諒無
取年長祗多辱古人善補過嗟爾當自勗

寄穆玄菴

昔游西海上明月落吾手欲訪識珠人惟有玄
菴叟山川阻且長望望空搔首由來希世寶知
者故希有

菴中

市聲入墟落甕牖未全曉蟲飛亦薨薨焉知此

生小群動隨天運宇宙長紛擾獨有菴中人冥
然化機表

贈孔汝錫

河清非難俟鳴鳥亦易聞傷哉獨立者異代無
同群調鍾欲誰須獻玉祗自勤士爲知己死古
人豈徒云我生信多幸激賞遇夫君清襟似淵
微妙論若蘭薰寂滅契玄理英華包藝文方欣
暫晤對遽愴遠乖分迢迢長安日杳杳大梁雲
預愁夢中路舉日空氣氲

南園對月與孔汝錫

避俗每郭外養疴亦園中索居無與娛君子欣
來同孟夏日猶短初筵俄景終幸茲三五夕可
令詩酒空移席陟亭榭緩帶弄絲桐落霞稍西
沒朗月已升東湛湛竹上露泠泠松下風眺聽
盡昭曠懷抱轉冲融詎厭綠觴滿但愁良夜窮
留連非荒樂悵別方匆匆

丘中

蕭條風雨散淒清松桂冷丘中一游睇處處雲

霞影稍愛夕陽佳復聽秋聲靜遙懷賞心侶歲暮空延頸

寄浚川先生

覽公談玄作贈公詠玄篇尋仙願未果懷舊心
悠然摠衣游郡齋言詩偏賞激東書謁京邸交
臂俄分析中歲再見公置酒浚郊廬自此若參
辰形迹緬相踈一別二十年相思定深淺獨游
郭南園憶公如在眼稷契亮天功巢許好山棲
同生堯舜世出處安能齊退藏誠自揣明歟何

濫與愧非伯齊倫謬當公叔舉我年已遲莫我
志但遂巡鄙儒信頑魯不識要路津枳棘偏荒
塗鴟梟競翔舞中有孤鳳皇哀鳴一何苦十日
出天衢龍飛欲何為不如反深淵俟彼風雨昔
世俗多崎嶇達人豈凝滯公能訪松子予亦從
公逝

次韻酬顧武祥

一廛郭外田五畝林間宅追蹤楊子雲希風謝
安石春墟雜沓紅秋逕朦朧碧優游不知老留

連轉成癖良朋茲見訪神交自疇昔臨流暫携手藉蘭仍布席晤言盡冥契賞心非外索誰謂衡門下亦在金門客高士輕官簿逸人貴仙籍矯首望天路與君同所適

莊生

莊生演黃老孟子述唐虞古今事已異見謂為狂迂章甫豈不貴越人非所須嗟嗟後代士高論將焉如

林卧

東南月出早林卧不知莫飄蕭石墮籜青熒松泫露意愜已忘言神遊如有遇空懷寄同好此境莫能賦

留別

素乏霸王略頗深山海情一充南省賦再反東臯耕踈放日增甚沉痾歲彌嬰好遯愆幽期鳴豫貪浮名進止苟如此焉能獲利貞初服念不忘遠遊心所輕遲遲去燕闕眇眇向吳荆薊門雨雪暗廣陵潮水生八公遺桂樹千里饒蕞羹

名勝分可悅心賞遙難并願言慰離索引領伺
同聲

薛考功集卷第三

薛考功集卷第四

考功郎中毫薛蕙君采著

七言古詩

元夕篇

皇都佳麗地春日艷陽年共愛元宵好爭歌明
月篇元宵明月滿蓬萊春色先從上苑來千門
宛轉銀屏隔萬戶叅差金鎖開千門萬戶連雙
闕綵女新粧踏明月映牖窺窓態轉多含嬌凝
睇情無歇正逢春日愛芳菲復值春宵縫舞衣

燈光斜照珊瑚枕香氣空薰雲母屏此時天子
盛遨遊離宮別館足風流纔開鳳島張燈架更
起鰲山結綵樓綵樓岩巒鰲山側複道交衢對
南北萬燭翻疑白日光千燈却亂春星色春星
宿靄迷煙霧仙籞分明見天路空裏翩翩翠蓋
飛雲中冉冉鸞輿度翠蓋鸞輿千萬騎伐鼓縱
金動天地御仗層層錦繡圍廣場隊隊魚龍戲
就中別有王侯客三三五五長安陌夜夜經過
許史家朝朝游戲金張宅金張許史聞驕奢金

燈玉帶剪春紗鴛鴦比翼玫瑰樹翡翠雙栖蕊
苗花龍膏鳳炬列千行蕙火蘭煙百和香月華
照耀瑠璃障霧影氤氳玳瑁梁可憐豪侈誰能
似可憐行樂心無已曲罷頻移歌舞筵醉後重
游燈火市月市星衢遊未徧東城南陌時相見
妖童繡勒五花馬倡女銀車九華扇妖童倡女
繁華子雙去雙來帝城裏粉色偏從月下明衣
香故向風前起調笑行歌懽未闌浮影流光夜
遽殘朝來試過狹邪路墮靨飄花那忍看

龍虎山歌送范同年汝和

豫章之東龍虎山南斗垂耀當天關祝融廬霍
引襟帶三江九派奔迴還山盤水曲入仙城疊
巘層崖上紫清中天日月照樓閣二十四岩金
碧明巖室洞房煙霧裏玉戶金牕宛相似丹井
深通滄海潮翠屏倒挂天河水翠屏錦壁百千
迴綠岫青岑宮殿開羽人龍駕去不返仙吏仍
飛雙鳥來雙鳥朝天還帝鄉飛來飛去名山傍
仙嶠雲霞長不改天壇花藥依然在却向山中
寄紫書故人闕下遙相待

送范師舜調南京兵曹兼訊顧英玉

范雲移官赴南署買舟官河下江去君家住在
岷峨西回首江東望鄉處蜀客吳人解相笑可
惜風流不向調江左應傳洛下名尚書更步臺
中妙尚書臺中多形相逐郎官騎馬出載酒
觀棋樂未稀登山臨水情非一暇口六代繁華
地弔古悲歌動人意冶城無後謝公行新亭曾
灑周郎淚君向吳城我燕市年來亦憶尊鱸美

幸爲傳聲謝顧榮何時共飲三江水

寶劍篇

昔聞區冶鑄寶劍冶中蛟龍歛揮霍冶開火歇
蛟龍失黯黯青雲吐芒鏃赤山丹液色鬱勃白
帝金精氣縈薄翠垠磨出斗洞明寶鞘裝成金
錯落鷓鴣膏瑩科斗字鹿盧玉帶芙蓉萼坐上
傳看疾風起尊前拔舞驚虹躡正元蒼黃化石
隕天吳辟易隨潮却果然魑魅忘精爽坐令神
物藏冥漠中來世事不可測須臾淪落豐城側

玉珥彫零苔蘚昏雪花蠹蝕塵沙黑當年得意
斷犀象今朝失路埋荆棘地底龍眠鬼猶泣斗
間氣騰人未識泥塗污辱君勿悲風雲變化時
將逼掘獄重開雙寶刀入市爭酬萬金直自古
英雄每如此平生蹉跎長歎息哀歌謾作行路
難高飛自有橫天翼

羲和行 五月日食作

羲和東來海神泣丹霞閃爍玄雲急風纏赤道
吹星隕龍鬪青冥學人立軒轅太一迷南北蟠

桃若木無顏色上帝巫咸杳不聞仙人側目天門黑

題陳明之畫菊爲何子元先生作

憶昔先皇十八年學士風流滿當代就中太僕真蕭灑至今畫菊流傳在中丞此卷畫更奇秋花錦石雲霧姿追思盤礴解衣處想見酣歌縱酒時當時畫此蓬萊觀自謂平生此其冠畫成持贈燕泉公滿堂醉客空嗟嘆回首斯人已難得長使中丞憐粉墨拂紙偏驚白露寒開緘

稍覺悲風色中丞遠適西南地索我題詩見交誼百年許與詎偶然萬里提携不相棄陳琳後事不堪論水部文章今尚存病客安能賦思舊主人須爲續招魂

鄭繼之館內積雪爲小山戲作長句

君不見見少谷子饑寒卧病長安裏長安臘月雪一文恠爾朝來何技癢陵晨掃雪爲小山數峯突出窓戶間我時過門訪子入子也階前荷鋤立亂垂散髮雜塵垢斜挽短衣半沾濕憶子前

年覽吳越東游四明尋禹穴慣矜赤脚踏層冰
苦覓黃精斲山雪平生好奇心未已今朝作戲
聊復爾斲冰積雪止俄頃走海驅山宛相似仄
崖崩壁色悽愴玉膏乳竇陰森爽磊砢初驚大
禹鑿成削翻疑巨靈掌君不見五侯甲第當此
時紅羅斗帳流蘇垂銅盤燒蠟綵雲散玉油拂
面香風吹吁嗟如子何爲爾低眉感額凍欲死

南唐李昇畫竹題云昇元閣上作賜宋

齊丘

南唐草創金陵日君王材藝還非一宮中初學
書畫圖人間早見丹青筆昇元閣上朝置酒九
華山人前上壽興酣點染雲霧飛畫成揮霍蛟
龍走瀟湘洞庭洲島畔雨葉風梢翠凌亂珍重
仍兼御字題留傳擬作山人玩人代悠悠朝市
改何言畫本今猶在嗚呼金石亦銷毀細看粉
墨無光彩我持此卷三嘆息英雄割據終何益
虎踞龍蟠尚復存黃旗紫蓋非疇昔富貴繁華
如夢寐千秋萬歲皆相似君不見西京空聚茂

陵書傷心不獨江南事

黃河行贈管汝濟病歸

崑崙播元氣積石歎靈波東南控赤縣西北注
黃河黃河西北來崩浪觸山開天輪感驚電地
軸沸奔雷雷奔萬餘里鼓怒何時已懸流白日
下漂沫浮雲裏洪波直射三秦道巨靈擘山山
爲倒二華峰開齒齒披九嶷夾繞蛟龍抱九嶷
截薛青天上下有黃河日搖蕩歎岍長移漁父
船清沙好挂僊人杖僊人西歸聊卜築開門正

對黃河曲浦口鳧鷖上石牀雲中薜荔垂菊屋
男兒挂冠苦不早玉體憂來日枯槁爾去應尋
河上公我行欲訪南山皓

送太乙子歸華山

太乙子棄擲腰間組酒酣慷慨拔劍舞閭闔冥
冥不可入西游華山騎白虎騎白虎登金梯金
梯高高與雲齊手翳芝草捫虹霓子先茅龍肯
相與隨君翱翔逐玉女

題郭鳴世鶴亭

第五橋東野竹青主人結屋占雲汀扁舟初入
泛花水三徑新開放鶴亭亭下蕭蕭鶴一群含
姿弄影雪紛紛水邊沙暖行春日石上風寒卧
白雲白雲浩蕩滄洲遠憶昔雌雄巢翠巘青田
養子衆雛成華表辭鄉千歲返何年偶被雲蘿
制羽毛摧折樊籠際拂霧仍思紫蓋飛臨風尚
想華亭唳小苑斜連鴈鷺陂上林却繞鳳凰池
不須奮翅緱山去相送鸛鸞集玉墀

梁園歌贈李川父

君不見梁王富侈甲天子國東築園三百里
道崛崎象河漢曲池潺湲寫海水詔書益賜膏
腴地羽獵常從千萬騎爵馬珍奇外域來賓客
游談四方至本期千秋樂未改奄忽繁華不相
待金輿玉輦已零落鴈渚鳧洲竟安在君不見
異時鄒陽趨闕下出入雍容擅文雅寧知讒人
一開口束縛翻爲獄吏罵又不見漢廷不重馬
相如謝病因上梁王書浮沈頗與諸生伍枉却
當年賦子虛梁園一旦生秋草二公坎壈何足

道人間萬事皆虛無詎用區區惡懷抱大梁李
侯才絕妙司馬鄒生爾同調江海遙分刺史符
文章不待承明詔相逢問訊今如何命也豈免
常蹉跎南歸又復不得意贈子聊作梁園歌

醉歌贈姚汝修

蛟龍未得意居然客泥瀆區區蛭與蚓見之不
掛目寧知一旦挾雲霧赤電青蜺下相逐白日
收光海水沸南山摧倒爲平陸丈夫處世亦如
此豎子莫輕天下士君不見張儀南游楚相橫

范叔西奔魏齊死姚天子飲我酒高歌爲君起
君今抗讎王侯側我時跌宕塵埃裏時人作色矜
權貴笑我摧藏不足畏淮陰仰視里中兒李廣
愁逢霸陵尉勸君第飲君莫辭英雄會合當有
時少年何惜千日醉他日飛騰猶未遲

嵩丘歌送蔣子雲

君不見衡恒泰並奠九州豫州巨鎮名嵩丘中
天照耀白日景后土灌注黃河流往者天皇題
寶帙五嶽真形標第一三花隱映玉女臺二峯

老幼集卷四
九
羅列仙人室曾聞軒后駐雲帡復有周儲吟鳳
笙緱氏山頭鸞鶴去鼎湖水上蛟龍迎君看萬
乘亦何似古人棄之如脫屣紛紛流俗笑此言
肯把山林易青紫世間萬事俱零落何用明珠
彈鳥雀因嗟季子狹三河轉憶尚平娛五嶽我
今思歸殊未還夢中每每游僊山頗疑羽翼落
天外但覺烟霧非人間君不見謝公率自神蕭
爽天姥羅浮夢來徃予也頻夢山中游心知自
是神僊流異時最愛安期術擬卧名山采芝朮

羽化青雲雖末期肥遯丹崖詎爲失送君南行
洛陽道一望嵩山愁絕倒谿口空餘躑躅花澗
中不見菖蒲草薄游已自厭風塵多病祇堪學
隱淪明年定訪浮丘伯爲掃雲林作主人

鄴都引

君不見當塗父子全盛時鄴都佳麗侔京師芙
蓉池上開朱邸玄武苑中羅羽旗九錫纒終俄
受禪宮中更起文昌殿功臣北闕賜甲第詞客
西園侍清宴雄圖擬謂千萬年于今城闕空雲

煙梁沛真人不復起歌舞曾無銅爵伎西陵誰
辨古墓田東流惟見漳河水

夏夜暑甚不寐

手中白團難禦暑冰簟細縷熱如許高樓夜半
擗衣起簾前坐看銀河徙想像蓬山殊不惡桂
樹玲瓏蔭珠閣僊人月下汲玉井海風蕭蕭雲
髮冷

酬劉希尹贈古鏡歌

故人遺我魯國之寶鏡遠自燕都寄譙邑慙歎

預恐到時久封外兼將錦爲襲夜來夢君在君
側朝得君書長歎息開絨寒雪灑衣袂入手秋
蟾照顏色背間篆刻無人識鳥跡鱗皴土花蝕
依稀尚有雙盤龍似我於君連羽翼當年與君
游帝鄉豈意今者遙相望摩挲明鏡覽愁髮坐
驚騷屑生秋霜此時顛顛君不見作詩寄君空
斷腸

寶刀篇

譙國王生名博古故物疊累滿環堵中有百辟

之寶刀太白之精來下土爛如白虹皎如雪紫
氣紛紛長不滅卷之如鈎垂欲折舒之還成三
尺鐵異哉神物那可比堅能割玉柔繞指蛟龍
變化迺如此刀雖竒譎不宜爾王生王生善寶
藏何年持之獻我皇指麾上下威四方廷中佞
臣如負芒佞臣屏退進羣賢巍巍帝德光配天
小儒敬賦寶刀篇頌聲洋溢千萬年

結交篇

交道之難應有以大都難在無君子小人見利

不見義相與安能保終始憶昔曾爲吏部郎四
方賓客滿門墻汝南拔士各題品北海愛才偏
激昂一朝余坐大禮罪被放歸田遂沉廢當時
門下結交人去作誰家座上賓一書不復訪生
死半菽那能分賤貧歲寒僅有數君在餘子悠
悠難重陳君不見古人高誼難比儔今人薄惡
真可羞請謝當塗少年輩甘與深山麋鹿游

置酒辭

美人洗拂白玉卮老夫自歌置酒辭桑榆之光

能幾時含情不飲復待誰我生材質無所宜不
擬縱任恒矜持譬如散木不自知欲就繩墨何
其癡盛年一去悔可追却對蛾眉慙鬢絲君不
見謝公自是天下寶偃仰東山頗枯槁平生掩
鼻向富貴一見嬋娟翻絕倒人間混濁殊可憎
聊憑尤物娛懷抱屈原湛身亦何補賈生慟哭
空自苦漫將一縷係千鈞祗餘碧血埋黃土九
州浩浩揚洪波念之豈免泣滂沱懷寶迷邦遭
詆訶手援天下可奈何未如間處且婆娑快飲

美酒聽清歌及今爲樂勿蹉跎明年白髮應更
多

酬張路寄畫佛及觀音

江夏吳生久物故畫手人間無獨步爾來張子
出大梁又見丹青照縑素奈何絕藝多自惜未
許千金換真跡高士飛揚不易馴貴人造請空
無益遙聞病叟耽玄理爲畫釋迦兼大士貫休
羅漢殊未工虎頭金粟真堪擬精舍安居伴白
雲玉毫瞻禮對鑪薰他年負入深山去應寫伽

陀重贈君

贈王子正侍御

江漢英靈鍾蜀都蜀之作者何代無嚴楊王馬
耀往牒後有陳李兼三蘇國朝異才揚太史爾
來任趙俱名士同時王子復同調四賢相望頗
相似嗟哉王子才爲累正色立朝多論議未能
默默御史臺甘作栖栖州縣吏小州寡事無簿
書時時訪我城南居嵇阮偏知酒中趣莊惠劇
談濠上魚君如雲間折翼之孔鸞我如蛟龍失

水而沒鱗百年窮達豈足道祇願長生學黃老
俗儒白首誦陳編舌弊耳聾殊可憐文章成名
第小技博學擬聖非真傳虛生浪死不自悟尚
構空言嘲列仙仙人約我游峨眉君亦莫負青
城期蜀嚴湛冥真我師君家諫議將何爲綏山
儻遇騎羊子共附髯龍隨所之

希夷先生墨竹歌

并序

蕙家藏希夷先生墨竹之右先生大
書絕句云莫貪枝葉亦成龍要悟從

頭到底空已遇神僊施筆力風霜不
可再磨礪後題云陳圖南作就賦畫
之左有章次道魏仲先二絕句魏并
有序其畧言錢公淡成入華山叅先
生先生作此贈之蕙自少時即聞之
長老云昔野人掘地得石函中得此
畫而周揮使廣取之蓋宣德正統間
也其後史揮使璵得於廣子文而方
揮使焯復得於璵子經嘉靖丁酉

迺得於焯孫顯宗蕙觀先生詩窮理
入微蓋非後世詩人所能言而其字
體雄偉不凡兼有古人之法度亦非
近代書家之比也鄉使得於外郡莫
詳所自則其真贗亦不能明幸而出
自吾鄉爲數故家所傳事跡彰著衆
人皆能言之其爲先生真跡可信不
疑然數故家皆武人莫知先生爲何
知人雖頗愛重此畫而不知其爲希

世之寶也又幸毫地不當要衝故此
畫得爲吾鄉舊物歷百有餘年而蕙
得之不然已爲有力者取之他所矣
蕙嘗讀邵子擊壤集有觀先生真及
墨跡三絕句云未見希夷真未見希
夷跡徒聞希夷名希夷心未識旣見
希夷跡復見希夷真始知今與古天
下常有人希夷真可觀希夷墨可傳
希夷心一片不可得而言於戲後世

不爲不知先生顧其知先生甚淺如
邵子所謂不可得而言者此豈世俗
之所能知哉有能真知其說然後知
先生之道超然天地之始彼神僊云
者其殆強爲之名乎抑先生之詩固
以一切皆空豈獨有所謂神僊耶邵
子之意亦若是也雖然世無邵子孰
不以斯言爲孟浪之言夫嘉靖庚子
歲秋七月大寧居士薛蕙識

水墨淋漓數莖竹琅玕不羨多成束飛白玲瓏
一片石夜光休誇大盈尺云何此畫價無敵迺
是希夷之真跡列仙籍中多品流先生况是神
仙伯宣靖仙材亦不羣尋師遙入華山雲解顏
一盼不易得敢望揮毫遺此君畫首題詩兼姓
字鳳翥龍蟠三十四丁寧舉似一轉語截斷世
間無限事領略真仙上上機叅同古佛空空義
古來畫史雖無數爭似仙人得天趣筆勢翩翩
入三昧玄旨明明標一句梵經合受天人禮仙

跡那無鬼神護五百年來如電過一幅霜縑完
未破湍水東流鶴不歸峨眉西逝龍猶卧故鄉
之子慕神仙偶收圖畫如有緣錦囊新裝綠玉
軸彤管更賦青霞篇安得至寶不磨滅期與好
事相流傳先生聞此應大笑水中捉月真可憐
希夷先生墨竹短歌

大寧齋中至人竹浙浙天風撼蒼玉大書詩畫
真三絕價敵宣和六千軸伊川空有句傳神世
俗寧知僞與真祇恐明珠終暗擲此君他日與

何人

文徵仲畫老子見贈舊嘗寄觀音像併

此奉謝

本家楚瀨鄉遠師周柱史流沙竟長往谷神應
不死真源古縣近西原祠宇荒涼舊宅存不見
猶龍寫生色祇同摸象解空言獫山先生今顧
陸贈我真人真一幅天機淵默藏根抵日角分
明辨眉目先生高士非畫師一紙千金難易之
四方求者苦不得我未往求先見遺往年曾寄

圖畫像髮髯白衣來海上今者揮毫圖伯陽
惚青牛歸故鄉老夫家居貧轉劇偶然富與公
侯敵簞瓢遺乏無斗儲篋積緘滕有雙壁平生
嗜好釋與仙幸遭同病還相憐已將彩繪作佛
事更擬形似傳靈筌學通二氏我何有畫備六
法誰能先不慚俚調酬妙品往來聊結三生緣

贈袁貞白

故人昔訪我詵月新秋節十年重命駕復對春
宵月故人真有人情明月故向今宵明可憐

明月如盟主知君與我心相許結交肯與流俗
同此心願學延平翁

張南園畫雲南圖

嘗聞司徒作者流暮年畫思生滄洲丹青點拂
隨興到雲霧幻眇令人愁君不見益州形勝佳
且殊可惜僻在西南隅中原斷絕罕人跡遂使
吳越矜區區司徒平生此都文學才氣海內
無獨憐山水久寂寞因之貌作雲南圖大山小
山相盤挐龍鱗攢羅插虎牙洪波萬折走其下

石根奔蹙如蛟蛇行人含顰色咨嗟鳥道上被
青天遮巖披谷坳有平地孤城百雉千人家生
綃淡墨勢頗窄萬里滇池氣相敵山川空濶神
爲開不覺沉吟悲古跡古來此地號邊鄙邪指
牂柯連越雋秦代新開五尺道漢家更代昆明
水嶺陬海落通中夏翡翠明珠半天下始聞大
將泛樓船復遣詞臣祝金馬只今郡縣窮南土
風俗相傳勝前古世封刺史上計書附塞蠻夷
占編戶何況司徒此間出文獻從今更難匹山

中已報解銀魚世上仍看留綵筆我言此卷真
奇最不獨毫端工粉繪應同蜀相畫夷圖想是
成周作王會

東方朔竊桃園爲許封君題

弱流西下崑崙畔石閣丹梯起樓觀綠水旁
紫赤玉林白雲微映空青岸昔年阿母栽桃樹桃
葉桃花已無數青鳥飛時屢自迷仙人折罷翻
相妬浮生變化如雲烟此花一實三十年隣家
小兒亦何物往往竊實來山前自從脫幘金門

裏賣藥逃名會稽市神仙恍惚難具論粉繪依
稀無乃是海東之翁許遠游有道似是東方儔
未肯朝天取卿相時間縮地游滄洲短褐匡牀
成隱居養鷄牧豕混樵漁題詩遠寄看圖畫操
杖終期間素書

題竹

使君擁千騎蹋雪向長安雪中芳草盡零落贈
此青錦金琅玕江南丘墟繞江水中有琅玕拂
雲起應龍夜穿崖石裂江妃朝游春雨歇風梳

露洗助嬋娟沙崩水濺映潺湲坐看綵筆題苔
蘚想見翠葆搖風煙只今四海歌太平甘露晝
降黃河清願言植此玉輝側會聽丹山鳳鳥鳴

梅花用東坡韻

朔雲凍壓江南村春風解返梅花魂貞心習慣
冰霜苦正色不受塵沙昏平生愛花同臭味好
事寄我栽郊園最憐一樹傲霜霰遠勝百卉凋
涼溫誰將錦軸寫踈影恍如金粉迎朝暎未邀
皂蓋宴野圃已報堦戟朝天門嗟予多病但高

卧對此欲賦將何言夜來雪罷郡齋冷莫辭看
畫開清樽

泣玉行

楚國獻玉人抱玉山中哭不見賞千金徒聞刑
雙足一國之人皆若狂玉爲石兮石爲玉世俗
是非雖反覆礫石何榮玉何辱被褐懷玉真丈
夫哀哀泣玉何爲乎

薛考功集卷第四

薛考功集卷第四

三

